



UNIVERSITÄTS-  
BIBLIOTHEK  
PADERBORN

# **Jus Canonicum Ad Libros V. Decretalium Gregorii IX.**

**Huth, Adam**

**Augustæ Vindelicorum, 1732**

11. De plus petitionibus

---

[urn:nbn:de:hbz:466:1-63433](https://nbn-resolving.org/urn:nbn:de:hbz:466:1-63433)

*in 6.* Potest tamen Judex Ecclesiasticus, aliàs etiam incompetens, cognoscere super causà temporali incidente; quia hic non est incapax respectu causæ temporalis, uti laicus respectu spiritualis. Eodem modo dicitur de casibus in *L. 3. C. de judic.* & *L. 1. C. de ord. cogn.* expressis.

*Resp. 3.* In causa spoliï si reus conventus ab auctore super spolio vicissim spoliationem opponat *per modum exceptionis*, prius audiendus est reus super exceptione spoliï, eaque probatà, auctori prius respondere non tenetur, quàm restitutus sit. *6. 2. h. t.* Ratio, quia exceptio spoliï dilatoria est; & regulariter exceptiones dilatoriæ ante *L. C.* sunt proponendæ. Si spoliatio autem *per modum actionis & reconventionis* proponatur, cum hoc casu duæ sint causæ principales, utraque causa simul tractari debet & terminari juxta dicta ad *Tit. de mut. petit.*

## TITULUS XI.

### De Plus Petitionibus.

**Q.** *1.* Quid contineat hic titulus, & quot modis plus petitio fieri possit? *Resp.* ad 1. Cum quandoque auctor plus petat, quàm sibi debeatur, idque à reo ipsi objici, contraque eum formari possit exceptio & quæstio incidens, hinc titulus hic priori subjicitur.

*Resp.* ad 2. Quatuor modis plus peti potest, re, loco, tempore, causa. *c. un. h. t. §. 33. v.* plus autem *Inst. de Action. 1.* Re seu quantitate plus



plus petitur, dum v. g. petuntur 100. cum debeantur solum 50. vel dum tota hæreditas petitur, cum debeatur pars tantum: quod ipsum tamen intelligitur juxta Pirh. *h. t. n. 4.* de principali debito, non de accessoriis, adeo ut is qui petit fundum cum fructibus aut rem cum interesse, nec fructibus sibi debitis nec interesse, pœnam plus petentium non incurrat. 2. *Causâ* plus petitur, dum quis pro re in genere vel alternativè debita petit rem determinatam, v. g. si cui promissus est equus, petit Bucephalum; cui debentur 50. imperiales vel equus, determinatè equum petit. Ratio, quia in debitis *rerum* indeterminatis & alternativis electio est debitoris. §. 33. *¶. hinc autem, Inst. de action.* *Causâ* plus petens differt à plus petente, quòd plus re petens ad illud agat, quod nullo modo in obligationem deductum est; in alternativis autem debitis utrumque sit in obligatione, ita tamen, ut electio sit penes debitorem. 3. *Loco* plus petitur, dum aliquid petitur nec in loco initii contractûs, nec in loco, in quem solutio promissa, nec in loco, ubi debitor habet domicilium. Rationem, cur hic plus petere dicatur, insinuat §. 33. *cit. ¶. loco.* 4. *Tempore* plus petitur, dum quis præmaturè, seu ante diem statutum, vel ante impletionem conditionis petit. §. *cit. ¶. tempore,* ubi & notandum, quòd actore plus petente reus negare possit totam petitionem. arg. *L. 13. §. 3. ff. de reb. dub. &* quòd creditor per errorem minus, ac sibi debetur, petens non noceat sibi aut præjudicet. §. 14. *Inst. de Action.*



Q. 2. *Qua sit pœna plus petentium?* Resp. Olim plus petentes causâ cadebant, remque totam amittebant. §. 33. *Inst. de Action.* Hodie rigor hic sublatus est, unico casu excepto *L. unic. C. h. t.* In specie plus tempore petentis pœna est remotio illius ab instantia istius iudicii; condemnatio in expensas; duplicatio induciarum. *L. 2. C. h. t.* quæ duplicatio non de tempore, quod reliquum erat, & in quo plus petendo deliquit Actor, sed de toto tempore debet intelligi §. *temporales 10. v. hodie autem de except.* Plus petentis causâ, re, loco, pœna est condemnatio in expensas omnèque damnum, quod suâ plus petitione reo intulit. *c. unic. h. t.* quia verò pœnæ tripli quæ statuitur §. 24. & 33. *v. sed hac. quidem Inst. de Action.* in *c. un. h. t.* mentio non fit, agitur etiam §. 24. de expensis nomine sportularum factis, quæ in foro Ecclesiastico non præstantur. *c. 10. de vit. & honest. Cler.* Hinc pœna tripli in foro Can. non obtinet.

Q. 3. *Quomodo pœna plus petentium evitari possit?* Resp. 1. Non incurritur, si actor probavit se non dolo malo, sed justo errore plus petiisse. *L. fin. C. h. t. c. un. eod.* 2. Si plus petens ante litis contestationem pœnitet, uti omnes *c. un. h. t.* imò etiam si post litem contestatam ante sententiam definitivam pœnitet, uti probabilius multi *ex eod. c. & arg. L. 16. C. de bon. liberatim.* 3. Si Reus non opponat exceptionem plus petitionis. *Minsing. Wiestn.* 4. Si iusta subsit causa plus petendi, v. g. debitum ante diem præfixum,

*Liber II. E fixum,*



fixum, quia debitor est de fuga suspectus. L. 2. C. de jure dot. vel debitum in alio loco, qui nunquam comparet in loco statuto debitor &c.

## TITULUS XII.

De causa possessionis & proprietatis

§. I.

De Possessione.

**Q.** 1. Quid & quotuplex sit possessio? Resp. Possessio à positione pedum vel sedium dicitur. Et vel sumi potest *objectivè* pro ipsa re possessa uti in L. 5. §. 10. ff. de reb. eor qui sub tutel. Vel *formaliter* pro ipsa detentione & insistentia rei, ut in L. 15. §. 3. ff. ex quib. caus. Mai. & hæc dici potest possessio *facti*, de qua h. potissimum agitur. Vel pro *effectu* seu *jure*, quod oritur ex rei detentione, & vocatur possessio *juris*, constituitque speciem juris realis. L. 44. §. ult. de acq. vel amitt. poss. & definitur, *jus reale seu legitima potestas detinendi rem ut suam, & commodis inde provenientibus fruendi.*

*Resp. 2.* Possessio *facti* definitur, *legitima detentio rei tanquam suæ, vel detentio rei corporis animi, & juris adminiculo;* quæ definitiones coincidunt. Dicitur 1. *Legitima*, non quasi omnis possessio facti sit justa aut fiat favente Lege, cum & fur rem furtivam possideat, sed quod fiat Lege non irritante, quomodo Laici inhabilitantur ad